

• sawcuenh •

Ndawsim Miz Mwngz

心中有你

□ Danz Hijvah / 谭喜花

Ngamq haeujninz, Buzgouj rox-nyinh aen ndang mbouj soeng geijlai, lumj miz fag mid rae he coi haeuj ndaw noh ndaw nyinz bae nei dotgvabgvab.

Buzgouj naemj: Gyanghaemh mbwn laepfubfub, mbouj ndei bae yihiyen, roxnaeuz dingj gvaq hwnz neix couh ndei lo.

Buzgouj ndawsim yienznaeuz baenzneix naemj, liuh mbouj daengz seizneix aen ndang lumj deng fagmid coi yied daeuj yied haenq lo, dot daengz ndawuk ndawgviz bae, Buzgouj nyaenx mbouj ndaej “aeya aeya” sing hung swenj hwnjdaej.

Goenggouj ninz aen rug doiqnaj Buzgouj, dingqny i gij sing swenj Buzgouj, de yaengyaeng hwnj congz, yaengyaeng byaij gvaqdaej cam naeuz: “Naihgeq, mwngz baenzlawz la?”

Seizneix saeknaj Buzgouj cungj bienq heu lo, aen ndang gienj baenz ndaek ndeu, gangj vah cungj yaek mbouj ok, de sing iq naeuz Goenggouj yienghneix yienghneix.

“Diuz mingh vunz youqgaen, mwngz baenzlawz mbouj caeuxdi lwnh gou nyi ne? Gou seizneix sikhaek dwk dienhvah hawj Cangzciz lwnh de nyi, heuh de soengq mwngz bae yihiyen cij ndaej.”

Cangzciz dwg daeglan dog Goenggouj Buzgouj, de daengx ranz vunz youq lingh aen ranz, liz aen ranz Goenggouj Buzgouj youq neix mbouj gyae, byaij saek bak mij baedauq couh daengz.

Mbouj yaep ndeu, Cangzciz daij geij boux beixnuengx ndawmbanj haici daeuj daengz lo, gyoengqvunz nyaengqnyaennyaen dawz Buzgouj fuz hwnj gwnzci bae.

Goenggouj byaij gvaqdaej, fwngz he gaemdawz faj fwngz Buzgouj ndaetndaet bae, lingh cik fwngz lumhlumh gij byoemgyaeuj hauek Buzgouj, naeuz: “Naihgeq, mwngz bae yihiyen ndeindei yw bingh, lij miz gou ne.”

Aen ci lumj naq liz gung nei buet bongh baenaj, menhmenh saet haeuj ndaw laep lo.

Bihaenx, Goenggouj caeuq Buzgouj doxaeu mbouj geij nanz, Goenggouj couh gaen budui bae camgya Gang Meij Yenz Cauz, daeglwg de seizhaenx lij youq ndaw ndang Buzgouj, caengz seng okdaej ne.

Yaek bae Cauzsenj seiz, Goenggouj gaem vanj laeuj he, bek aek doiq mbwn mieng naeuz: “Mbouj gaj caez gyaep deuz caeggeq Meijgoz, ciuhneix nyengh mbouj dauq mbanjranz!” Gangj sat, baez ngiengx hoz couh ndoet vanj laeuj sat, yaengx fwngz

couh boemz aen vanj roengz gwnz-namh bae soiq caez lo.

Raen Goenggouj vah gangj miz-rengz maenhywd, gyoengqvunz hix cungj gaenlaeng yienghneix mieng.

Buzgouj yienznaeuz hix gig haemz caeggeq Meijgoz, hoeng ndaw-sim gig sij mbouj ndaej Goenggouj biek de bae hoenxcienq, baenq gyaeuj gvaq mbiengj he bae aeu genbuh laeglemx uet raemxda.

Goenggouj raen le, riu naeuz Buzgouj: “Daej maz ne, seizneix guekgya miz nanh, dou dwg bouxsai, aeu bae hoenxcienq henhoh guekgya, mwngz vih dou ndaengndiengq cij baenz.”

Vah dwg baenzneix gangj, aen sim Goenggouj cix lumj raq raemx-langh he bongh hwnj bongh roengz, youq giz dieg hoenxcienq, lwgyienz mbouj miz lwgda hix fouzcingz, lae lwed vutmingh dwg saeh bingzciengz. Baezneix biek bae, ndaej mbouj ndaej dauq cungj mbouj rox, engq mbouj gamj naemj daengzcog baenzlawz yiengh lo, gangj gij vah haenx, dwg vih nai aen sim mehyah, hawj de youq onj swhegeij cij ndaej ansim bae hoenxcienq.

Goenggouj caeuq budui daengz Cauzsenj le, aenvih caengz ndaej hag nyingz cungq gvaq, mbouj ndaej cigsoh bae dieghoenxcienq doxhoenx. Goenggouj dingq bouxdaeuz anbaiz, ngoenznaengz hawj gyoengq bouxbing dajcawj, ciengx max.

Ngoenznaengz mbouj dwg dajcawj couhdwg gyaep gyoengq max bae langh, Goenggouj roxnyinh gig mbwq, de geijlai maqmuengh ndaej gaem cungq bae hoenx vunzdig ha.

Bouxdaeuz raen Goenggouj sim-fanz, couh naeuz de: “Bouxcoz, gaej simgip, sou gij bing moq ngamq daeuj mbouj rox guh maz, guh gij hongcab neix gonq, caiq naeuz dajcawj ciengx max hix dwg vih guekgya ok faenh rengz ha. Hag gaem cungq nyingz cungq hix dwg aeu faen buek bae hag bae lienh cij ndaej, buek laeng couh lwnz daengz mwngz lo.”

Mbouj nanz, Goenggouj caen ndaej caeuq gyoengq bing moq bae hag gaem cungq nyingz cungq lo, doeklaeng hix ndaej bae hoenx vunzdig lo.

Youq gwnz dieghoenxcienq, Goenggouj hoenx vunzdig gig ak, laeb gvaq sam daengj goeng, bouxdaeuz bouxbing cungj haenh de.

Mizseiz Goenggouj boux ndeu gag muengh coh aen fuengyiengq mbanjranz, de hix gig niemh Buzgouj, hoeng caeggeq Meijgoz caengz gyaep deuz, gyanbaz mbouj rox seizlawz cij ndaej raennaj. Gyanbaz cingzngieih

lumj diuz mae, yied naemj yied raez, yied naemj sim yied luenh. Goenggouj laepda hwnjdaej, baez haeb heuj, dawz gij saeh neix vutvak gvaq mbiengj ndeu bae gonq.

Song bi lai gvaqbae, caeggeq Meijgoz deng hoenxbaih lo, Goenggouj hix ndaej dauq mbanjranz lo. Goenggouj sim’angq, hoeng hix gig siengsim, aenvih gij ciyenginh gax-gonq guhdoi hix caez daeuj Cauzsenj, mizmbangj gaenq vutmingh youq gizneix, ciengxlwenx ninz youq benq dieg neix, caiq hix mbouj ndaej dauqma guekcoj; mizmbangj yienznaeuz lij lw diuz mingh dauq, hoeng mbouj dwg gen goengq couhdwg ga raek, hawj vunz raen le sim’ in dangqmaz.

Raen Goenggouj song da rongh seiqguengq caezcienz dauqma, Buzgouj coemj haeuj ndaw rungi Goenggouj bae gotdawz de ndaetndaet bae, cuengq sing daej hwnjdaej, ndawsim gij soemj van haemz manh cungj youq seizneix cuengq okdaej.

Seizneix daeglwg Goenggouj gaenq ndaej song bi lo, gangj vah caengz seuq geijlai, rox byaij-ndiekndiek lo. Daeglwg neix youh iq youh daemq, caeuq duz gaeqboux ca mbouj geijlai sang.

Dingq Buzgouj naeuz, daeglwg ngamq doekfag seiz ngamq miz song gaen lai naek, lumj diuz genbongz bouxlaux nei hung, youh iq youh nyieg, yungzheih baenzbingh, caiqlix ngoenz beij ngoenz reuq, da yawj yaek mbouj baenz lwg lo. Mbouj miz ngaenz bae ra canghyw, Buzgouj cij ndei gag hwnj bya bae ra ywdoj yw. Buzgouj sinsin hojhoj, cungisuenq gouq lix diuz mingh daeglwg.

Buzgouj bonjlaiz ndangdaej couh mbouj suengq ndei, daj seng roengz daeglwg le, de swhegeij hix baenzbingh ndawndwen, daengz seizneix bingh hix mbouj ndaej duenh rag, ciengzciengz mbouj dwg gyaeuj ngunh da raiz, couhdwg gizneix dot gizde in.

Seizneix vah youh gangj doxdaeuj, Buzgouj bae yihiyen yw bingh geij ngoenz couh ndaej dauqranz lo. Goenggouj muengz cam Cangzciz deng geijlai ngaenz?

Cangzciz riu naeuz: “Seizneix guekgya saedhengz sinhnungzhos lo, yw bingh ndaej siu bae dingzlai ne, baezneix daxbuz bae yw bingh ngamq deng sam cien maenz ngaenz ndwi.”

Roxnaeuz vunz bungz saeh angq simcingz sangj, daj rox gij ngaenz yw bingh ndaej siu bae dingzlai, Buzgouj couh cuengqsim haeuj yihiyen yw bingh. Menhmenh gij binghgoek Buzgouj caen yw ndei lo, vunz bienq ndaej cingsaenz gvaekgvaek, byaij loh

yamq din mbaeumbiengmbieng lumj bouxcoz nei, Goenggouj hix vih de sim’angq raixcaix.

Vah naeuz faex geq rag nduk, vunz geq ndang bingh, ndwenngoenz menhmenh baenaj, vunz hix bi geq gvaq bi, Goenggouj roxnyinh aen dungx de ciengzciengz getndumj, de laihnaeuz swhegeij heuj vauq nyaij ngaiz byaek mbouj soiq, gyanx roengz congghoz bae sieng aen dungx lo, ndigah hix mbouj dawz gijneix cuengq haeuj ndawsim bae.

Ngoenz he banringz gwn ngaiz-ringz seiz, Goenggouj roxnyinh aen dungx youh in hwnjdaej lo, lumj miz maz doxgaiq camx nei, youh lumj miz maz doxgaiq youq ndawde gienjlulu, loengh ndaej Goenggouj hanhheu rim ndang, ndang saenzfoegfoeg.

Seizhaenx Cangzciz daej yawj daxgoeng daxbuz, raen daxgoeng yienghneix, couh heuh vunz daej caez soengq Goenggouj bae yihiyen lo.

Daengz yihiyen genjcaz cij rox, Goenggouj dwg saejgungz fazyenx, aeu sikhaek guh soujsuz cij ndaej.

Goenggouj naeuz: “Gou bineix ndaej goujcib geij bi lo, ciuhneix caengz baenzbingh haeuj yihiyen gvaq, mbatneix dwg mbat daih’ it, mbouj rox baenzlawz yiengh ne.”

Soujsuz gig swnhleih, gvaq aen singgeiz he le, Goenggouj ndaej okyen maranz lo.

Ngoenz daihngieih haetromh, cunhcanj caeuq geij boux vunz riuj haujlai doxgaiq daej daengz ranz Goenggouj. Cangzciz seizneix daej damqyawj song bouxgeq gvaq le, cingq yaek okbae, raen cunhcanj gyoengqde daej daengz, miz di doeksaet, mbouj rox maz saeh, baenq ndang couh daiq gyoengqde haeuj ranz.

Cunhcanj gyoengqde byaij daengz ndawranz, raen Goenggouj naengh youq ndawding yawj densi, couh gvaqbae caeuq de gaem fwngz, riuho ho naeuz: “Mwngz bouxlaux ciuhneix mbouj yungzheih, ndawranz laux nyaec cungj baenzbingh, hix gwn gvaq haujlai haemzhoj, mwngz doiq guekgya miz gung’ yen, miz goenglauz caemh miz hojlauz, guekgya mbouj lumz mwngz, cwngefuj mbouj lumz mwngz, bineix banggunz daengz ranz sou, baezneix mwngz bouxlaux haeuj yihiyen yw bingh mbouj deng ngaenz law, cienzbouh ndaej siu caez.”

Goenggouj dingq le, song da gyaengz raemx, naeuz: “Guekgya raeuz yied daeuj yied ak lo, bienq ndaej engq hungmbwk fouqgiengz lo, raeuz gwndaen youq aen seiq neix geijlai vuenyungz ha!”